



KEMENTERIAN SUMBER ASLI, ALAM SEKITAR
DAN PERUBAHAN IKLIM

SIARAN MEDIA

JEJANTAS RIMBA FRIM STRUKTUR PERTAMA DIBINA GUNA ALUMINIUM TARIKAN EKOPELANCONGAN MALAYSIA

Jejantas Rimba atau dikenali sebagai 'Forest Skywalk', adalah satu tarikan ekopelancongan utama Institut Penyelidikan Perhutanan Malaysia (FRIM). Tarikan tersebut membantu menyokong industri pelancongan negara ke arah mempromosi kelestarian sumber biodiversiti negara.

Menteri Sumber Asli, Alam Sekitar dan Perubahan Iklim (NRECC), YB Nik Nazmi Nik Ahmad, ketika merasmikan Jejantas Rimba sempena lawatan kerjanya ke FRIM, Kepong pagi tadi berkata ia merupakan struktur pertama yang dibina menggunakan aluminium yang dibuka kepada orang awam bagi tujuan ekopelancongan di Malaysia.

Dengan adanya produk baharu untuk aktiviti ekopelancongan ini, para pengunjung akan dapat menikmati pengalaman berada di atas silara hutan (forest canopy) di dalam persekitaran hutan tropika buatan manusia yang terbesar di dunia.

Jejantas yang berukuran 18 - 50 meter tinggi dan 250 meter panjang ini mula beroperasi pada 31 Ogos 2020 yang dibiayai oleh Kementerian Pelancongan, Seni dan Budaya Malaysia (MOTAC).

Berdasarkan rekod, FRIM telah menerima seramai 1,145,381 orang dari tahun 2018 hingga Mac 2023 yang meliputi pengunjung awam, lawatan secara rasmi dan pas riadah. Manakala pengunjung ke Jejantas Rimba khususnya, telah menerima seramai 56,919 orang bagi tempoh 2020 sehingga Mac 2023, dengan pendapatan berjumlah RM768,168.00.

Dalam masa yang sama YB Nik Nazmi juga melancarkan rangkaian produk penghalau serangga jenama **Ciera** yang diberdayakan melalui teknologi FRIM serta menyaksikan penyerahan Sijil Pendaftaran Varieti Baharu Tumbuhan dan Pemberian Hak Pemiak Baka klon elit kacip fatimah.

Di majlis tersebut juga, YB Nik Nazmi menanam pokok damar minyak (*Agathis borneensis*) sebagai acara simbolik bagi memperingati lawatan ini.

Turut hadir, YBhg. Dato' Rosli Isa, Ketua Setiausaha NRECC; YB Tuan Gobind Singh Deo, Ahli Parlimen Damansara; YB Elizabeth Wong, Ahli Dewan Undangan Negeri (Adun) Bukit Lajan; Mohd Khairul Kassim Setiausaha Bahagian Pembangunan Prasarana MOTAC; Awang Daik Mohd Nor, dan Pengarah Bahagian Pembangunan Teknologi, Perbadanan Pembangunan Teknologi Malaysia (MTDC).

KEMENTERIAN SUMBER ASLI, ALAM SEKITAR DAN PERUBAHAN IKLIM (NRECC)
27 JUN 2023

Unit Komunikasi Korporat | Kementerian Sumber Asli, Alam Sekitar dan Perubahan Iklim (NRECC)
Tel. : 03-8000 8000 | Faks : 03-8889 4763



nreccmalaysia



nreccmalaysia



nreccmalaysia



nreccmalaysia